

15. MAJ – SVJETSKI DAN PORODICE

Neka je hvala Allahu, dž.š., Gospodaru svih svjetova. Neka su salavat i selam na Poslanika Muhammeda, s.a.v.s., njegovu časnu porodicu, ashabe i sve sljedbenike, koji osnivaju i čuvaju svoje porodice.

Braćo moja u Dini Islamu! Danas je 15. maj – Svjetski dan porodice. Tim povodom danas se u svijetu ljudima skreće pažnja na važnost osnivanja porodice kao najvažnije ćelije društva te njenog čuvanja, radi lične i opće koristi kao i opstanka ljudskog roda. Mi smo, naime, svjedoci kontinuiranog napada na porodicu, koji se ispoljava na više načina: promovisanjem istospolnih brakova, otvaranjem mogućnosti promjene spola, insistiranjem na seksualnoj pedagogiji još u ranom periodu školovanja pa čak i u obdaništu, legalizovanjem prostitucije, odobravanjem bluda, zabranom poligamije, oduzimanjem djece nedovoljno savjesnim roditeljima i sl.

Ciljevi navedenog napada su jasni – smanjiti svjetsku populaciju, oslabiti čovjeka kao jedinku i učiniti ga ovisnim o državi, stvoriti poslušne radnike, dati više posla i prostora socijalnim radnicima, sudovima i advokatima, jednostavno, uvesti što veću kontrolu nad stanovništvom. Oni koji nisu svjesni te opasnosti vrlo lahko upadaju u postavljene zamke i postaju lahak plijen spomenutog sistema.

Da bi se izbjegle loše posljedice i sačuvala porodica, Islam nudi jasna rješenja i uputstva. Već od ranog djetinjstva zagovara odvajanje braće i sestara u postelji, neoženjenim i neudatim savjetuje da stupe u brak čim steknu uvjete za njega te da se prije toga strpe i pomognu postom, da se ne kvare zaruke osim ako za to postoji valjan razlog, da se čuva čednost i djevičanska i bračna (bez obzira na dostupnost i veliku ponudu bluda), da se ne razmišlja o braku bez djece, da se uloži maksimalan trud u odgajanju i obrazovanju svoje djece, te da se brak ne razvaljuje osim ako za razvod postoji validan razlog.

Jer porodica nije samo puka društvena norma ili forma. Porodica je čovjekova potreba i, ujedno, njegova glavna osnova za koračanje Pravim putem. U tom smislu Uzvišeni Allah upozorava ljude da čuvaju sebe i svoje porodice od džehennemske vatre, čije će gorivo ljudi i kamenje biti, a nad kojim je devetnaest strogih i žestokih meleka koji nikome ne daju iz Vatre izaći. Drugim riječima, Uzvišeni Allah poziva ljude da osnivanjem i čuvanjem porodice, odnosno življenjem čednim i vjerničkim životom te odgojem djece u Islamu, sebi i svojim ukućanima obezbijede mjesto u Džennetu. Naravno, da bi to bilo moguće, onda i ukućani moraju pristati na "pravila igre". Brak se mora čuvati pod svaku cijenu (osim ako postoje nepremostivi razlozi za razvod), otac mora biti glava porodice, djeca moraju biti poslušna i zahvalna roditeljima, unutar porodice mora se razgovarati, dogovarati i planirati, i svaka aktivnost mora imati svoju osnovu u Islamu, jer Islam je Sistem života.

Najbolji primjer sretne i uspješne porodice dali su nam naš Poslanik Muhammed, s.a.v.s., i njegova supruga Hatidža, r.a., koji su rodili šestero djece i pri tome nam pokazali da najveće bogatstvo koje roditelji svojoj djeci mogu ostaviti jeste ODGOJ. I to odgoj u Islamu. A Islam se ne ogleda u dužini brade i kratkoći nogavica, u bjelini ahmedije i ljepoti džubbeta, u broju obavljenih hadžova i umri, dobrovoljnih namaza i ispoštenih dana, već se Islam ogleda u lijepom ponašanju. Na najvišim stepenima u Džennetu i najbliži Allahovom Poslaniku, s.a.v.s., na Ahiretu će biti oni koji budu imali najljepše ponašanje, a najljepše ponašanje imaju oni koji imaju lijep odgoj.

Zato, braćo moja, čuvajmo svoje porodice! Naravno, život u porodici nije lahak, ali je bez porodice nezamisliv. Djeca jesu nama iskušenje, ali su istovremeno i blagodat. Kao što narod kaže: "Dok su mali piju mlijeko, kad porastu piju krv." "Dok su mali ne daju spavati, kad porastu ne daju živjeti." Ali su, ipak, i izvor radosti. Za uspješan i sretan bračni i porodični život valja naučiti balansirati. I što je jako važno, valja živjeti u skladu sa vremenom. Mi ne možemo odgajati djecu na isti način kao što su nas odgajali naši roditelji, jer su izazovi drugačiji. Ali, ima ono što je osnova za svaki bračni i porodični život. Nje se treba držati, a ostalo je (kao što smo rekli) stvar balansa.

Molim Dragog Allaha da svima nama omogući da osnujemo porodice, te da nas uputi i da nam pomogne da sebe i svoje porodice sačuvamo od Vatre i nastanimo u Dženneti Firdevsu. Amin.

Na kraju samo da podsjetim da od ponedjeljka, akobogda, počinje časni mjesec Zul-hidždže, odnosno mjesec hadža. Njegovih prvih deset dana su Dragom Allahu najdraži dani u godini, pa s toga pozivam sebe i vas da u tim danima povećamo pokornost svome Gospodaru, tj. da pojačamo ibadet (učenje dova, zikra, tekbira i Kur'ana, klanjanje nafila i dobrovoljni post, davanje sadake i sl.)

Našim dragim Semanić Nermirnu i Irmi, kao i svim ostalim putnicima na hadž želimo hajirli put uz dovu Dragom Allahu da ih na putovanju čuva, ibadete im primi i hadž mebrur učini.

I s obzirom da se bliži Kurban-bajram, još jednom podsjećam da je vrijeme da obezbijedimo svoje kurbane. Oni koji svoje kurbane žele da uplate preko Islamske zajednice u BiH mogu to učiniti u našem Džematu ili direktno uplatiti u IZBA-u. Cijena kurbana ove godine iznosi 310 €, a rok za uplatu je 26. maj.

Pa bujrum! Neka vam Dragi Allah podari svako dobro.